

Fraccion di AVP:

Parlamento a reuni riba solucion pa dumpnan ilegal

ORANJESTAD - Miembronan di parlamento a reuni den e Comision di Medio Ambiente, Infraestructura y Salubridad cu e ministernan Benny Sevinger y Mike de Meza, riba e temanan di medio ambiente, procesamiento di sushi y dumpnan ilegal na Aruba. Entre e miembronan di Parlamento cu tabata presente tabata tin Donny Rasmijn, Mervin Wyatt Ras, Jennifer Arends-Reyes, Norman Roos, Jeffrey Kelly, Rene Herdé (tur di AVP). Tambe e miembronan di e fraccion di MEP Dagui Oduber, Adi Thijsen y Xiomara Ruiz-Maduro tabata presente. E ministernan a contesta tur e preguntanan cu miembronan

di parlamento a haci. Tambe nan a splica e maneho riba e terenonan menciona pa yega na solucionnan definitivo. E ministernan a invita tambe expertonan di medio ambiente, di Serlimar y di DTI pa participa na e reunion aki.

Ley di medio ambiente
Pa loke ta e ley di medio ambiente cu e miembro di AVP sr. Donny Rasmijn tin basta tempo ta pidi pe, e ministernan a informa cu dentro di dos siman e ley lo yega Consejo di Minister pa despues cana su caminda formal pa yega parlamento. E ley aki ta e ley general cu lo atende cu tur e diferente aspectonan di medio ambiente. Cu e ley aki hopi asunto cu nunca a wordo regla lo wordo

regla!

Dump moderno

Pa hopi aña partido AVP a boga pa un maneho di recoge y procesa sushi den un forma mas responsabel, eficiente y duradero. Pa e motibo aki for di oposicion caba AVP a propone un sistema di procesa sushi moderno. Despues di e debate di e “dump di MEP” cu a costa pueblo 28 miyon florin pero cu nunca a traha drechi, Gabinete Mike Eman a presenta un plan pa un sistema di procesa sushi cu lo converti sushi den energia. Esaki ta nifica cu no lo tin kimamento di sushi, holo stinki, contaminacion di awa y tera of seronan di sushedad mas. Ministernan a informa parlamento cu dentro

di dos luna e ley pa e sistema di procesa sushi den forma duradero lo yega parlamento pa wordo trata y despues ehecuta.

Dumpnan ilegal

Pa loke ta e 62 buraconan cu a cobra na Aruba pa saca santo y piedra y e 34 dumpnan ilegal cu tin tur rond di Aruba, for di 2011 ministernan Benny Sevinger y Mike de Meza a laga un grupo di profesional Arubiano presenta un plan pa atende cu e problema serio aki. E solucion pa e 62 buraconan ta pa tapa nan bek cu piedra, material di construccion, materia di mata y cu santo pa cera nan definitivamente. Pasobra si no cera e buraconan aki, nan ta bira ‘dumpnan ilegal’

den cua ta tira tur sorto di sushi y awa “preto” cu ta dañá nos medio ambiente, causa enfermedad y un peliger pa tur hende. E echo cu 34 di e buraconan rond di Aruba ya a bira “dumpnan ilegal” ta e prueba cu mester cera e buraconan aki. Despues di cera e buraconan lo dicidi hunto cu e doñonan di e tereno, kico ta haci cu e tereno yena. Na Yaburibari e dump ilegal a wordo cera y a converti e den un park cu hopi hende ta uza tur dia.

E mes un plan aki tin pa e buraco na Sabanilla Abou. E no ta bira un dump. Ta un dump di sushi so tin na Aruba. Esey ta na Parkietenbos. No tin y no ta bay tin mas tampoco. Asina e ministernan a splica.